

# Cart Egwchope De'en Bzoj San Pabən' Par Temtion'

## Pabən' chzoje' Temtion'

**1** Nada' Pab naca' apostol che Jesocristən' con can' gwnalažə' Diozən'. Gwleje' nada' par naca' apostol par nich chyixjui'a can' bene' lyebe de que gatə' yelə' mban zejlicane che notə'ətezə benə' gonlilažə' Jesocristən'. <sup>2</sup>Na' chzoja' le' Temtio dao', len' banona' ca xi'ina'. Chona' orasyon chnaba' lao Xacho Diozən' na' lao Xancho Jesocristən' əsa'aclenšgue' le' na' yesyə'əyašə' yesyə'əži'ililažə' le' na' so'onšgue' ca so cuzo' binlo len xbab de'en yo'o lo'o yichjla'ažda'ogo'onə'.

## Cheyalə' güe'echo dižə' che Jesocristən'

<sup>3</sup>Do yichj do laža'a cho'elaogua'a Diozən' can' gwsə'on de'le xaxtaogua'a ca', na' nezdə' lo'o yichjla'ažda'ogua'an de que chona' can' chazlažə' Diozən'. Na' yoguə' laste catə' chona' orasyonnə' cho'a yelə' choxcwlen che' par le'. <sup>4</sup>Chjza'alaža'a can' gwchežə' catə' beza'a gan' zo', teža na' še'elə' chzeləžə'əchgua' le'i lježjcho par nich yebeichgüeida' lo'o

yichjla'aždaogua'an. <sup>5</sup>Na' chona' xbab can' chonlilažə'o Diozən' do yichj do lažə'o can' chso'on xna'agolo' Loida na' xna'o Eunise bedote, na' zoa' segor de que chonlilažə'one' can' chso'on lega'aque'.

<sup>6</sup>De'e na'anə' chneyoida' le', ben xte ga zelao saquə'ədo' par gono' ca de'en ben Diozən' lao na'o gono' catə'an bxoə na'ato'onə' yichjo'onə' par blo'eto' de que Diozən' gwleje' le' par gono' xšine'enə'. <sup>7</sup>Diozən' babenə' chio'o Spirit che'enə' zon lo'o yichjla'ažda'ochon'. De'e na'anə' bito cheyalə' žebcho. Na' de'en zo Spirit che'enə' len chio'o, nezecho chaclen Diozən' chio'o len yelə' guac che'enə' na' chactezə' chaquecho che lježjcho na' chnabia' cuincho par choncho can' chazlažə' Diozən'. <sup>8</sup>De'e na'anə' bito yeto'ido' go'o xtižə' Xancho Jesocristən' na' nic yeto'ido' chia' de'en naca' pres laogüe de'en chyixjui'a xtiže'enə'. Cheyalə' co'o gwchejlažə'əcho əžaglaochə' ca de'en gac checho laogüe de'en chyixjue'echo dižə' güen dižə' cobə che Jesocristən', na' Diozən' gaquəlene' chio'o len yelə' guac

che'lenə' catə'ən əzaglaochō. <sup>9</sup>Catə' cuiṇə' xe yežlyon' Diozən' bsi'e xneze gwleje' chio'o par naccho lažə' ne'lenə'. Na' catə' gwzolo benlilažə'əcho Jesocristən' Diozən' bebeje' chio'o xni'a de'e malən'. Na' de'en gwleje' chio'o par naccho lažə' ne'lenə', bito bene' ca' por ni che bilə de'e güennə' bencho. Gwleje' chio'o chedə' nži'ilaže'e chio'o. <sup>10</sup>Diozən' bablo'ine' chio'o can' nži'ilaže'e chio'o de'en bsele'e Jesocristən' ben' bebej chio'o xni'a de'e malən'. Jesocrist na'anə' bene' par nič əžin ža cuezə yelə' gotən'. Na' de'en chejle'echo dižə' güen dižə' cobə che'lenə' nezecho de que deczə yelə' mban zejlicane checho.

<sup>11</sup>Diozən' gwleje' nada' par nič əchyixjui'a dižə' güen dižə' cobə che Jesocristən' na' par nič naca' apostol che'lenə' na' chsed chlo'ida' xtiže'enə' beṇə' ca' cui zjənaquə beṇə' Izrael. <sup>12</sup>Na' de'en chsed chlo'ida' xtiže'enə' de'e na'anə' chžaglaogua' nga. Pero bito cheto'ida' che de'en chžaglaogua' dia' ližya nga, chedə' nombi'a Diozən' ben' chonlilažə'a. Baben cuina' lao ne'lenə' na' nezdə' de que nape' yelə' guac par gone' ca sotezə soa' gonlilažə'ane' xte catə'əch əžin ža yidə Jesocristən' de'e yoblə.

<sup>13</sup>Gwnaošga yoguə' de'en babsed bablo'ida' le', la' lenṇə' naquən güen, na' bito cuejyichjo' de'en chonlilažə'o Jesocristən' na' de'en chaddo' che' na' che beṇəchən'.

<sup>14</sup>Be' latjə gaquəlen Spirit che Diozən' le' par nič sotezə so' əgwsed əgwlo'ido' dižə' li de'en babzejni'ida' le', chedə' Spirit nan' zon lo'o yichjla'aždə'ochoṇ'.

<sup>15</sup>Nezdo' de que Figelon' na' Ermogenesən' na' yezan beṇə' ljuežjcho ca' nitə' Asian' bagosə'əbejyichje' nada'. <sup>16</sup>Pero na' Onesiforon' bito beto'ine' chia' de'en dia' ližya nga, sino btipe' lažə'a zan las. Xancho Diozən' gwlo'e'əsgue' can' nži'ilaže'e le' na' family che'lenə'. <sup>17</sup>Catə' bide' Roma nga bene' byen beyilje' nada' na' beželene' nada' dia' ližya nga. <sup>18</sup>Na' nezdo' can' goclenchgüe' nada' Efeson'. Chṇaba' lao Xancho Diozən' əgwlo'ine' le' can' nži'ilaže'ene' catə' əžin ža choglaō Xancho Diozən' che yoguə' beṇə' šə zjənape' dolə' o šə cui zjənape' dolə'.

**Cheyalə' co'o gwchejlažə'əcho  
len de'en əzaglaochō lao  
goncho xšin Jesocristən'**

**2** Na'a xi'indaogua'a, de'en chaclen Jesocristən' le' benchechlažə'o ben xšine'ena'. <sup>2</sup>Na' yoguə' de'en babsed bablo'ida' le' lao beṇə' ljuežjcho zan ca', bsed blo'in beṇə' ca' nitə'ətezə nite'e chso'one' complir can' cheyalə' so'one', beṇə' gaquə yoso'osed yoso'olo'ine'en beṇə' yoblə.

<sup>3</sup>Bguo'o bchej len bitə'ətezə de'en əzaglaogo' lao gono' xšin Jesocristən' par nič ca' saquə'əlebədo' ca to soldad gual.

<sup>4</sup>Nezecho de que notono beṇə' gaquə gone' xšine' žlac zde' yelə' soldadən', chedə' cheyalə' gone' con can' na ben' chnabia' le'.

<sup>5</sup>Na' nezecho de que ben' naquə deportist bito gaquə si'e premio šə bito chzenague' che yoguə' reglas ca' catə'ən chytje'. <sup>6</sup>Na' leczə nezecho de que ben' cheləle chon

žin yixə'əna' chzi'e part nech che  
 cwsešə'n' par cuine' antslə ze'e  
 chnežjue' che beṇə' yoblə. <sup>7</sup>Ben  
 xbab che de'en chzejni'ida' le', na'  
 Xancho Jesocristən' gaquəlene' par  
 nič šejni'ido' can' cheyalə' gono'  
 xšine'enə'.

<sup>8</sup>Na' ben xbab che Jesocristən'  
 ben' goljə yežlyo nga lao dia che  
 de'e Rei Dabin', na' bebane' ladjo  
 beṇə' guat ca' can' chyixjui'a  
 dižə' güen dižə' cobə che'enə'.

<sup>9</sup>Na' de'en chyixjui'a dižə' güen  
 dižə' cobə che'enə' de'e na'anə'  
 chžaglaogua' na' dia' ližya nga ca  
 to beṇə' mal juisy. Pero la'anə'əczə  
 nada' dia' ližya nga, bitobi  
 gaquə so'on beṇə' par nič cui  
 gasə' laljə xtižə' Diozən' doxenlə.

<sup>10</sup>La'anə'əczə chžaglaogua' nga  
 zotezə zoa' chyixjui'a xtižə' Diozən'.  
 Chyixjui'an par nič yeziquə'əchlə  
 beṇə' bagwlej Diozən' par əsa'aque'  
 xi'ine' so'onlilaže'e Jesocristən'. Na'  
 šə so'onlilaže'ene', yebeje' lega'aque'  
 xni'a de'e malən' na' gwnežjue'  
 lega'aque' yelə' mban zejlicane.

<sup>11</sup>Dižə' quinga zjənaquan de'e li:  
 Šə ngodə'əcho txen len Cristən'  
 ca de'en gwso'ot beṇə' le',  
 leczə ngodə'əcho txen len le' ca  
 de'en bebane' ladjo beṇə' guat  
 ca' par nič žjəyecho len le'.

<sup>12</sup>Šə chio'o chonlilažə'əcho Cristən'  
 chgo'o chchejlažə'əcho catə'ən  
 chžaglaogua',  
 leczə nabi'acho txen len le'.  
 Šə cuejyichjcho Cristən' leczə ca'  
 le' cuejyichje' chio'o.

<sup>13</sup>Na' la'anə'əczə šə chio'o cui  
 goncho complir can' nacho  
 goncho, bia'aczə zo le' gone'  
 con can' ne'enə',

la' naquəcze' beṇə' chon complir  
 len bitə'ətezə de'en ne'.

**Can' goncho xšin Jesocristən' binlo**

<sup>14</sup>Ben par nič beṇə' ljuežjcho  
 ca' chso'onlilažə' Cristən'  
 žjəsyə'əzalaže'e de'e ca' bagwnia',  
 na' ben mendad cui yesə'ədilə  
 yesə'əšaše' entr ljuežjga'aque' por  
 ni che bizə dižə' de'e cui zeje.  
 Xancho Diozən' naque' testigw  
 can' chso'one'. Na' šə yesə'ədilə  
 yesə'əšaše' beṇə' ca' choso'ozenag  
 chega'aque' cui se'ejle'e xtižə'  
 Diozən'. <sup>15</sup>Bentezə ben xte ga  
 zelao saquə'ədo' par nič yebei  
 Diozən' can' chono'onə' na' par  
 nič bito gaquədo' zto' de'en chono'  
 xšine'enə'. Na' əgwsed əgwlo'ido'  
 cayanə'ən zeje xtižə' Diozən'.

<sup>16</sup>Bitobi cas gono' che bitə'ətezə  
 dižə' de'en yesə'əna beṇə' de'en  
 cui naquə de'e zaque'e lao Diozən',  
 chedə' dižə' ca' chxoayaguən  
 beṇə' par nič chyalə'əch  
 chso'onche' de'e malən'. <sup>17</sup>Na' xtižə'  
 beṇə' ca' choso'osed choso'olo'i  
 de'e ca' zjənac ca' chonən par  
 nič beṇə' ca' choso'ozenag  
 chega'aque' chəsə'əbejyichje'  
 de'en chso'onlilaže'e Cristən', ca  
 chen de'en naquə mal chyitjən  
 doxen lao cuerp chechon' na'  
 chžiayi'in len. Imeneon' na'  
 Fileton' choso'osed choso'olo'ine'  
 dižə' güenlažə' de'en nac ca'.

<sup>18</sup>Lega'aque' bagosə'əbejyichje'  
 de'en naquə de'e li chedə'  
 choso'osed choso'olo'ine' de que  
 chio'o chonlilažə'əcho Cristən'  
 babebancho ladjo beṇə' guat ca' ca  
 de'en bocobe' yichjla'ažda'ochon'  
 na' cuat əžin ža yolis yosbane'

chío'o len cuerp chechon'. Na' de'en choso'osed choso'olol'ine' ca', bałə beṇə' chso'onlilažə' Cristən' chsa'aczejlažə'e šə xtižə' Cristən' naquən de'e li. <sup>19</sup>Chío'o chonlilažə'əcho Cristən' gwxaquə'əlebecho ca to lan yo'o de'en naquə de'e gual. Na' nyoj Xtiže'lenə' checho nan: "Diozən' nezene' non' zjənaquə xi'ine'." Na' leczə nyojən nan: "To to beṇə' chesə'əne' de que chso'onlilažə'e Xancho Diozən' cheyałə' yesə'əbejyichje' cuich so'one' de'e malən'."

<sup>20</sup>Nezecho de que lo'o liž beṇə' gwni'a ca' zjəde no yesə' xguaguə na' no ša' de or na' de plət, na' leczə zjəde no xguaguə na' no ša' de yag na' de gon'. Bałən chso'onən žin par len de'en zjənaquə xoche na' yebałən chso'onən žin par len de'en zjənaquə de'e zban. <sup>21</sup>Notə'ətezcho šə bito naocho de'en choso'osed choso'olol'i beṇə' güenlažə' ca' gwxaquə'əlebecho ca to yesə' o to xguaguə de'e chon žin len de'en naquə xoche chedə' guaquə goncho xšin Cristən' de'en zaquə'əchgua. La' šə cui naocho de'en choso'osed choso'olol'i beṇə' güenlažə'əna' nachən' guaquə gon cuincho lažə' na' Diozən' na' socho probnid par goncho bitə'ətezə de'e güen de'en chene'e Cristən' goncho.

<sup>22</sup>De de'en chene'e la'ažda'omalchon' goncho žlac ne'e naccho beṇə' xcuidə', pero le' bito gono' bitə'ətezə de'e ca'. Be'elažə' ben de'en naquə güen lao Cristən', na' gwzotezə gwzo benlilažə' le', na' goque che ljuěžj beṇə'cho', na' leczə gwzo gwležə

binlo len lega'aque'. Be'elažə' ben yoguə' de'e ca' can' chso'on yeziquə'əchlə beṇə' chso'onlilažə' Xancho Cristən' beṇə' ca' zjənaquə yichjla'ažda'oga'aque'lenə' xi'lilažə'. <sup>23</sup>Bito əgwzenago' che beṇə' ca' zjənchoł yichjla'ažda'oga'aque'lenə' na' chesə'ədilə chəsə'əšaše' por ni che bizə dižə', chedə' šə əgwzenagcho che dižə' ca' zjənac ca' gonən par nič gaquəyožcho beṇə'. <sup>24</sup>Chío'o naccho beṇə' güen xšin Xancho Cristən' bito cheyałə' tiłə gwšašlencho beṇə'. Cheyałə' goncho güen len yoguə' beṇə', na' cheyałə' nezecho nac əgwsed əgwlo'icho beṇə' xtižə' Diozən' binlo, na' cheyałə' co'o gwchejlažə'əcho bitə'ətezə de'en chso'one beṇə' chío'o. <sup>25</sup>Cheyałə' gaccho beṇə' gaxjwlažə' catə' güe'echo consejw beṇə' ca' chso'onczə yichjlaoga'aque' cui chse'ejle'e dižə' li che Cristən'. Šə can' goncho, de repent gaquəlen Diozən' lega'aque' par nič yesyə'ədinjene' xtolə'əga'aque'lenə' na' sa'acbe'ichene' de'en naquə de'e li. <sup>26</sup>Na' šə yesyə'ədinjene' xtolə'əga'aque'lenə' yesyə'əchoje' xni'a gwxiye'len gan' nite'e na'a chso'one' con can' chazlažə'ənnə'.

**Naquən' so'on beṇə' catə' bazon yidə Xancho Cristən' de'e yoblə**

**3** Cheyałə' šejni'ido' de que catə' bazon yidə Xancho Cristən' de'e yoblə, lechgualə de'e zan de'e žaglaio chío'o chonlilažə'əchone'. <sup>2</sup>Ca tyemp na' nitə'əchgua beṇə' yesyə'əbeine' so'onchgüe' con can' na la'ažda'omalga'aque'lenə', na' yesyə'əbeichgüeine' mech, na'

so'elao' cuinga'aque', na' sa'alaže'e.  
 Yoso'ožia yoso'onite'e beṇə' na'  
 Diozən', na' bito yoso'ozenague'  
 che xaxna'aga'aque'. Bito so'e yełə'  
 choxcwlen che Diozən' na' bito  
 sa'ape'ene' respet. <sup>3</sup>Na' xte bito  
 güe'en latjə əsa'aquene' che beṇə'  
 yoblə, əsa'aque' beṇə' ggo'olažə',  
 əsa'aljlaže'e par yoso'oxie' gwdiłə,  
 bito gaquə yesə'əbeze' cuich  
 so'one' bitə'ətezə de'e malən'  
 de'en nan so'one'. So'one' znia  
 len ljuežjga'aque' can' chso'on  
 bia yixə', na' yesə'əgue'ine'  
 bitə'ətezə de'en naquə de'e güen.  
<sup>4</sup>Yesə'əxoayague' beṇə' parzə niçh  
 yoso'odie' lega'aque' lao na' beṇə'  
 contr chega'aque' ca', na' yesə'əne'  
 dižə' loc dižə' lžej na' so'ontezə'  
 de'e malən' sin cui bi xbab  
 so'one'. So'on cuinga'aque' xen, na'  
 yesyə'əbeine' so'one' legr lgu'a'a  
 əsa'aquene' che Diozən'. <sup>5</sup>Na' so'one'  
 ca əsa'aque beṇə' yeziquə'əchlə  
 de que chso'elaogüe'e Diozən',  
 pero bito so'e latjə yocobə Diozən'  
 yichjla'ažda'oga'aque'enə'.  
 Bito gono' txen len beṇə' ca'  
 so'on de'e ca' bagwnia'. <sup>6</sup>So'one'  
 can' chso'on bałə beṇə' ca'  
 chja'ac liž beṇə' par choso'osed  
 choso'olo'ine' dižə' güenlažə'. Na'  
 choso'oxoayague' no'ol ca' chsa'ac  
 šayeçhə šayen len xtižə' Diozən',  
 no'ol ca' nyan xtolə'əga'aque'enə'.  
 Choso'ozenagtezə no'ol  
 ca' che bitə'ətezə de'en na  
 la'ažda'omalga'aque'enə' so'one'.  
<sup>7</sup>De'e na'anə' choso'ozenague'  
 che notə'ətezə beṇə' goxoayag,  
 bitə'ətezə de'en choso'ozejni'ine'  
 lega'aque', na' bito chžin ža  
 əse'ejni'ine' de'en naquə de'e

li. <sup>8</sup>Can' gwso'on de'e Janes  
 na' de'e Jambres contr de'e  
 Moizezən' catə'an cui gwse'enene'  
 yoso'ozenague' che dižə' li de'en  
 be'elen de'e Moizezən' lega'aque',  
 leczə can' chso'on beṇə' goxoayag  
 quinga contr Diozən' por ni  
 che de'en cui choso'ozenague'  
 che dižə' li che'enə'. Zjənçhol  
 yichjla'azda'oga'aque'enə' yełə'  
 güen de'e mal chega'aque'enə' na'  
 bito chso'onlilaže'e Diozən' par  
 yebeine' lega'aque'. <sup>9</sup>Pero caguə  
 yosə'əxoayague' beṇə' sša, la' əžin  
 ža catə' yoguə' beṇə' sa'acbe'ine' de  
 que zjənçhol yichjla'azda'oga'aque'  
 na'anə' can' gwsa'acbe'i beṇə' de  
 que gosə'əçhol yichjla'aždao' de'e  
 Janesən' na' de'e Jambresən' catə'an  
 gwso'one' contr de'e Moizezən'.

**Consejw le'ezelaogüe de'en  
 bzoj Pabən' par Temtion'**

<sup>10</sup>Na' le' Temtio, banezdə' binło  
 yoguə' de'en chsed chlo'ida' che  
 Diozən', na' yoguə' can' chona'.  
 Nezdə' can' chi' yichja' par niçh  
 gona' porzə de'en chazlažə' Diozən'.  
 Nezdə' can' zotezə zoa' chonlilaža'a  
 Diozən' na' can' chgo'o chçhejlaža'a  
 len de'en chyi' chzaca'a. Nezdə'  
 can' zotezə zoa' chacda' che  
 Diozən' na' che beṇəçhən', na' can'  
 bito chbejəyichja' xšin Diozən'  
 catə' choso'oçhi' choso'osaquə'  
 beṇə' nada'. <sup>11</sup>Nezdə' can'  
 boso'oçhi' boso'osaque'e nada'  
 catə'an gwzochə Antioquian' na'  
 Iconion' na' Listran', na' nezdə'  
 bichlə de'en babžaglaogua'. Na'  
 leczə nezdə' can' bosla Xancho  
 Cristən' nada' lao yoguə' de'e  
 ca' bžaglaogua'. <sup>12</sup>De'e li nitə'

benə' yoso'ochi' yoso'osaque'e notə'ətezcho ngodə'əcho txen len Cristo' Jeso'osən' na' chi' yichjcho chzenagcho che Diozən'. <sup>13</sup>Na' ca naquə benə' mal ca' na' benə' goxoayag ca' zja'aqueche' so'onche' de'e malən'. Yoso'oxoayague' benə' yoblə na' se'ejle'e che dižə' güenlažə' de'en soe' benə'.

<sup>14</sup>Pero ca naco' le' Temtio dao', gwzotezə gwzo bzenag che yogua' de'en bachejni'ido' che Cristo Jeso'osən' na' de'en bachejli'o chei, la' nezczədo' noquə'əto'on bzejni'ito'on le'. <sup>15</sup>Dezd xcuidə'ətio'onə' nombi'o Xtižə' Diozən' de'en nyojən. Na' Xtižə' Diozən' de'en nyojən chzejni'in chio'o de que cheyalə' gonlilažə'əcho Cristo Jeso'osən' par niçh Diozən' yebeje' chio'o xni'a de'e malən'. <sup>16</sup>Cuin Diozən' bzejni'ine' benə' ca' bosozoj Xtižə'enə' xbab che'enə' par niçh ca' bosozoje'en. De'e na'anə' doxen Xtižə' Diozən' de'en nyojən zaquə'əchguan par chzejni'in chio'o che Diozən', na' par chdilən chio'o catə'an choncho de'e malən', na' par chonən chio'o consejw, na' par chzejni'in chio'o naquən' goncho de'en naquə güen lao Diozən'.

<sup>17</sup>Xtižə' Diozən' de'en nyojən chaclenən chio'o chzenagcho che Diozən' par niçh ca' chnezecho yoguə'əlol de'en cheyalə' ənezecho par sotezə socho goncho yoguə' cłaste de'en naquə güenna'.

**4** Yidə' Xancho Jesocristən' de'e yoblə deçhoglaogü'e'en naquən' gaquə che to to benəch benə' ne'e zjəmban na' benə' bagwsa'at, na' techlə nabi'e. Na' Temtio dao',

Jesocristən' na' Xacho Diozən' zjənaque' testigw chia' de que chona' mendad <sup>2</sup>sotezə so' chixjui'o xtižə' Diozən'. Gwdixjue'en catə' nlatjo' na' catə' chacdo' cui nlatjo'. Be'elen benə' dižə' par niçh yesə'ənezene' de que de'e malən' chso'one', gwdiləga'aque' che de'e malən' chso'one' par niçh yesyə'ədinjene'en, be'ega'aque' consejw, na' gwzotezə gwzo bzejni'iga'aque' sin cui žjəxaquə'əlažə'o. <sup>3</sup>Gwžin ža catə' cuich əse'ene benəchən' yoso'ozenague' che no əgwzejni'i lega'aque' de'en naquə de'e güen. De'e na'anə' yoso'otobe' benə' zan benə' yoso'osed yoso'olo'i lega'aque' dižə' de'en chesyə'əbeine'. <sup>4</sup>Yesə'əbejyichje' cuich yoso'ozenague' che dižə' lin' na' yoso'ozenagzeche' che dižə' güenlažə' de'en chsa'aljlažə' benə'. <sup>5</sup>Pero ca naquə le' ža, do tyempte gwnabia' cuino' par gono' can' chazlažə' Diozən', na' gwzotezə gwzo bguo'o bchejlažə' catə'an de de'e chžaglaogo', na' gwzotezə gwzo be' dižə' güen dižə' cobə che Jesocristən', na' ben doxen de'en baben Diozən' lao na'onə' gono'.

<sup>6</sup>Gwzotezə gwzo ben xšin Diozən', chedə' la' bazon baozə so'ote' nada' na' žjəyzoa' len Diozən'. <sup>7</sup>Nada' babena' xte ga zelao gwxaquə'əda' par chona' can' chazlažə' Diozən'. Babena' yoguə'əlol de'en ngo'o Diozən' lao na'a gona', na' zotezə zoa' chonlilažə'a Jesocristən'.

<sup>8</sup>Na' catə' žjəyzoa' len Diozən', gone' par niçh soa' mbalaz chedə' bentezə bena' de'e güen laogü'e'enə'. Xancho Jesocristən' zdacze' licha

na' catə' əʒin ʒa əne' bin' gaquə che  
yoguə' beŋəchən', caguə nadə'əzan'  
soa' mbalaz, leczə mbalaz nitə'  
notə'ətezəchlə beŋə' chesyə'əbeine'  
nite'e lez yidə Jesocristən' de'e  
yoblə.

**De'en chene'e Pabən' gon Temtion'**

<sup>9</sup>Ben byen par niçh yob yido'  
nga. <sup>10</sup>Nia' ca' chedə' Demasən'  
bagwlejiyichje' nada' na' bazjəyede'  
Tesalonican' de'en chi'ichgua  
yichje' bin' gatə' che' lao yežlyo  
nga. Na' ca' naquə beŋə' ca' yelə'  
ʒa, Cresentən' bazde' Galasian',  
na' Titon' bazde' Dalmasian'.

<sup>11</sup>Yetoga Locasən' nga'anlene'  
nada'. Che'ešgo' Marcon' catə'ən  
yido', la' lechguale chaclene' nada'.

<sup>12</sup>Babselə'a Tiquicon' Efeson'.

<sup>13</sup>Na' catə' yido' goxə'əšgo' xadon  
chia' de'en bocua'ana' Troasən' liž  
Carpon', na' bexə' libr ca' pero na'  
de'e žialao xench bexə'əšga rollos  
ca' de'en zjənyoj.

<sup>14</sup>Ljandr ben' chon žin len cobre  
babenchgüe' contr nada'. Xancho  
Diozən' əgwnežjue' le' castigw che  
de'en babene'. <sup>15</sup>Gapəšgo' ciudad  
len le', la' babenchgüe' contr nada'  
par niçh cui chixjui'a xtižə' Diozən'.

<sup>16</sup>Catə' bosə'odie' nada' lao  
jostis ca' de'e nech, ni tozə cui no  
bidə par əne' fabor nada'. Yoguə'  
beŋə' ca' bena' xbab əne' fabor  
nada' gosə'əbejiyichje' nada'.  
Chona' orasyon lao Diozən' chnaba'

yezi'ixene' chega'aque' de'en  
gosə'əbejiyichje' nada'. <sup>17</sup>Bia'aczə  
zoczə Xancho Diozən' len nada'.  
Len' goquəlene' nada' par niçh  
bi'a xtiže'enə' clar na' bene' par  
niçh zan beŋə' cui zjənaquə beŋə'  
Izrael gwse'enene' xtiže'enə'. Na'  
Xancho Dioz na' bosle' nada' lao  
na' beŋə' contr chia' ca'. <sup>18</sup>Na'  
nezdə' goslaczə Xanchon' nada'  
lao bitə'ətezə de'e gaquə chia', na'  
əgwcuasə' gwcue'ejcze' nada' len  
de'e malən' par niçh žjəyezə' len  
le' gan' chnabi'e. Ledoye'ela'ochē'  
na'a na' zejlicane. Na' can'  
gonšgaczczo.

**Chguape' diox yeto chope'  
na' chnablaže'e gaquəlen  
Diozən' lega'aque'**

<sup>19</sup>Eguapšgo' Priscan' na'  
be'en che' Aquilan' diox, na'  
leczə family che Onesiforon'.  
<sup>20</sup>Eraston' bega'ane' Corinton',  
na' bocua'ana' Trofimon' syoda  
Mileton' chacšenene'. <sup>21</sup>Ben xte ga  
zelao saquə'ədo' par yido' antslə  
ze'e gaquə zag. Leczə Eubolon'  
chguape' le' diox, len Podenten',  
na' Linon' na' Claudian' na' len  
yoguə' beŋə' bišə'əcho ca' nitə'  
nga.

<sup>22</sup>Xancho Jesocristən'  
gaquəlenšgue' le' len xbab de'en  
yo'lo lo'o yichjla'ažda'ogo'onə', na'  
gaquəlenšgue' yoguə'əle. De'e  
na'azən' chzoja'. *Pab*